


TEZAUUR LITURGIC

24 IANUARIE

**ACATISTUL
SF. CUVIOASE
XENIA
GRIGORIEVNA
DE LA
ST. PETERSBURG**



MOSCOVA, 2000



Ака́фист

свѣтѣй блаже́нной

Ксе́нии Петербу́ржстей

Конда́к 1

Избра́нная уго́дница Христо́ва, свѣта́я блаже́нная
Ксе́ние, хвале́бное пе́ние ти прино́сим, чту́ще
терпе́ние твоё и злострада́ние во́льное; ты же,
иму́щи дерзнове́ние ко Го́споду, во вся́ких беда́х
и напа́стех заступа́й нас, гре́шных, вызы́вающих
к тебѣ:

Ра́дуйся, Ксе́ние блаже́нная, моли́твеннице о
душа́х на́ших.

И́кос 1

Равноа́нгельски на земли́ пожи́ла еси́, блаже́нная
ма́ти, по успѣ́нии му́жа твоего́, без
приу́готовле́ния христиа́нскаго внеза́пу
сконча́вшагося, отве́ргла еси́ жизнь ми́рскую,
Бо́га моля́щи супру́га твоего́ ду́шу поми́ловати,
по́двиг юро́дства на себѣ прие́мши, стяжа́ла еси́
совершенство́ духо́вное. Того́ ра́ди услы́ши от
нас похва́лы сия́, тебѣ возно́симыя:

Ра́дуйся, Христо́ва уго́днице, в ми́ре надми́рно
пожи́вшая;

ра́дуйся, вся прило́ги ми́ра, плóти и диа́вола
победи́вшая.

Ра́дуйся, нищету́ во́льную на всю жизнь
избра́вшая;

ра́дуйся, сокрови́ще безце́нное на Небеси́
улучи́вшая.

Ра́дуйся, печа́ли и ско́рби безро́потно понéсшая;

ра́дуйся, людьми́ правосла́вными люби́мая и
слави́мая.

Ра́дуйся, о часе́ сме́ртнем по́мнити нас
призыва́ющая;

ра́дуйся, бли́жняго ду́шу па́че ми́ра сего́ люби́ти
науча́ющая.

Ра́дуйся, Ксе́ние блаже́нная, моли́твеннице о
душа́х на́ших.

Кондак 2

Ви́дяще странное тво́е житие, блаженная, яко
ты во цве́те мла́дости твоея́ во оде́жду мужа
твоего́ усопшаго облеклася, именем его
нареклася и себе умершу нарицала еси, дом же

твой и вся блага земная оставивши, скиталицу себе сотворила еси, сродницы безумну тя мняху, людие же боголюбивии воспеша: Аллилу́ия.

Икос 2

Ра́зум, от Бога дарова́нный, сокрыла еси, блаженная Ксение, во безумии мнимом; в суе́те града великаго аки пусты́ница жила еси, молитвы к Богу вознося́щи непрестанно. Мы же, дивя́щися житию твоему, воспеваем сице:

Ра́дуйся, от Бога крест тяжкий юродства на ра́ме твои приемшая;

ра́дуйся, мнимым безумием сияние благодати сокрывшая.

Ра́дуйся, именем мужеским наре́кшися, немощи женския отрешившаяся;

ра́дуйся, житием твоим Андрею, Христа ради юродивому, равная.

Ра́дуйся, все имение твое бедным людем разда́вая;

ра́дуйся, жилище Ду́ху Святому в сердце твоём уготовившая.

Ра́дуйся, всех прибегающих к тебе благое утешение;

раду́йся, от сме́рти внеза́пныя изба́вление.

Ра́дуйся, Ксе́ние блаже́нная, моли́твеннице о душа́х на́ших.

Кондак 3

Си́лою, свы́ше ти дарованною, благода́тию и мужеством зной и стужу́ лю́тую одолевала еси́ моли́твою, всено́щно твори́мою, и покло́нами; темже и прославлена бы́сть свято́сть твоя́, блаже́нная Ксeние, во отечестве́ нашем многострада́льном и во всем ми́ре правосла́внем, да зове́м с тобою́ Бо́гу: Аллилу́ия.

Икос 3

Име́ла еси́, о ма́ти блаже́нная, небо́ — покров, земле́ю же — ложе́ свое, попече́нием о теле, во оде́жду ветхую́ облеченном, небре́гла еси́, моли́твы же к Бо́гу пламенне возноси́ла еси́. Сего́ ради́ воспе́ваем ти си́це:

Ра́дуйся, ве́к твой земны́й без кро́ва прове́дшая; раду́йся, небесна́го кро́ва взыска́вшая и того́ улучи́вшая.

Раду́йся, по вся́ време́ны́ го́да всено́щно в поле́ моли́вшаяся;

раду́йся, покло́ны земны́я на вся страны́ света
тамо творивша́я.

Раду́йся, град Петро́в всено́щным бдени́ем от
бед огражда́вшая;

раду́йся, гнев Бо́жий от него́ многа́жды
отвраща́вшая.

Раду́йся, благода́тию Ду́ха Свята́го чуде́сно
согрева́емая;

раду́йся, хлад лю́тый душ наших моли́твою
твоею́ растопля́ющая.

Раду́йся, Ксе́ние блаже́нная, моли́твеннице о
душа́х на́ших.

Кондак 4

Бу́рю житейскую́, на сто́гнах града́ твоего
мяту́щуюся, кротостию́ и незло́бием одолевала́
еси́, мати́ блаженна́я, безстра́стие же посреде́
мира до́льного стяжала́ еси́. Ду́хом Святы́м
просвеща́емая, взывала́ еси́ подателю́ тишины́
сердечны́я Богу́: Аллилу́ия.

Икос 4

Слы́шаша лю́дие дар прозрения́ чудный, тобою́
явле́нный, свя́тая мати́, и диви́шася. Се, же́не
некое́й рекла́ еси́: «Приими́ пята́к, зде́ ца́рь на

коне... Угаснет». Сия же, не ведящи, яко ты пожар дома ея прозрела еси, притече во своя си и узре дом свой, во огни горящ. И по молитве твоей пламень огня угасе. Людие же страждущии к помощи твоей прибегаху, юже стяжавше, взываху ти сице:

Ра́дуйся, дар прозрения смирением крайним стяжавшая;

радуйся, дар сей на пользу и спасение страждущих являвшая.

Радуйся, свеще негасимая, к Богу в молитвах горевшая;

радуйся, верою твоею пламенною пожары домов угашавшая.

Радуйся, грядущая страдания людская аки настоящая зревшая;

радуйся, врачём безмездным и милосердным людем бывшая.

Радуйся, яко и нас, немощных, в вере укрепляеши;

радуйся, яко сиянием святости твоея народ православный озаряеши.

Ра́дуйся, Ксе́ние блаже́нная, моли́твеннице о
душа́х на́ших.

Кондак 5

Боготе́чною звездою осветила еси небосклон
града Петра апостола святость твоя, угоднице
Божия, уже бо людем во безумии греха
погибающим, явила еси им путь спасения, к
покаянию их призываючи, во еже вопити Богу:
Аллилу́ия.

Икос 5

Ви́дяще подвиги твоя молитвенныя, терпение
хлада и зноя великое, людие ослабити желаху
страдания твоя, ты же одежду и вся ими
приносимая нищим раздавала еси, нищету свою
аки сокровище хранящи. Сего ради слышиши от
нас сицевая:

Ра́дуйся, богатство твое токмо в любви к Богу и
ближним полагавшая;

ра́дуйся, ничтоже земное имевшая и всех
духовно богатившая.

Ра́дуйся, милостивым твоим сердцем
страждущим сострадавшая;

раду́йся, помо́щ им чре́з люде́й добрых
посыла́вшая.

Раду́йся, ми́ру чу́ждая, в ми́ре живу́щим добро
твори́вшая;

раду́йся, ве́ка сего́ суе́мудрия́ отвергати́ся
научи́вшая.

Раду́йся, пла́кати со плачу́щими нас
подвиза́ющая;

раду́йся, от сна́ тяжка́го греховна́го
пробужда́ющая.

Ра́ду́йся, Ксе́ние блаже́нная, моли́твеннице́ о
душа́х на́ших.

Кондак 6

Пропове́дана бы́сть свято́сть жити́я твое́го,
богоблаже́нная, жителе́м гра́да твое́го, егда́ ты о
младенце́, е́ще не ро́ждшемся, попече́ние явила́
еси́, и же́не благо́й, в до́ме, то́бою дарова́нном,
живше́й, проре́кла есй: «Бог тебе́ сына́ посла́,
те́цы на кладби́ще Смоле́нское!» Она́ же потща́ся
а́бие, и сироту́, ро́жденна́го у ма́тере, внезапу́ на
пути́ пострада́вша́я и сконча́вша́я, в до́м свой
прия́т. И вси́, а́ки се́мья еди́ная, все́ лета́ жити́я
свое́го тебе́ благода́ряще, Бо́гу Чело́веколю́бцу
взы́ваху: Аллилу́ия.

Икос 6

Возсия́ла есть слава подвиго́в твоих, блаженная
мати Ксение, егда ты но́щию на верх храма
Смоленскаго камни, тая́щися, носила еси, дому
Пречистыя возградитися пособству́ючи. Ныне
же вси моля́щися во святем храме сем и во
всем мире Божи́ем, на образ твой взира́юще,
воспевают сице:

Ра́дуйся, к подвиго́м благочестия всех
призыва́ющая;

радуйся, тайно творити добро навча́ющая.

Радуйся, храмы Божия зиждущим помога́ющая;
радуйся, святыню церковную возлюбившая.

Радуйся, в делах благих усердное поспешение;
радуйся, трудов наших на пути спасения
облегчение.

Радуйся, под кровом Божия Матере подвиги
творившая и тако почившая;

радуйся, с Нею ныне на Небеси о нас Христа
моля́щая.

Ра́дуйся, Ксе́ние блаже́нная, моли́твеннице о
душа́х на́ших.

Кондак 7

Хотя́ судьбы людския во благая устроити,
повелела еси деве кроткой на Охту тещи́,
прорекши: «Муж твой тамо жену погребает!» Она
же в недоумении бысть, обаче не преслуша
глагола твоего, и тамо вдовца младаго, над
гробом жены рыдавшего, сретила есть и
утешение в молитве ему подаде́. Году же
минувшу, тии венчашася; и в любви и согласии
многая лета поживше, чад своих наставляху
тебе, святая мати, чтити, Богу же воспеваху
песнь: Аллилу́ия.

Икос 7

Но́вое чудо показала еси, блаженная, посреде
скверны людския юродством сокрытую душу
твою в кротости ангельстей соблюдши. Научи и
нас, мати Ксение, и малыя доли скорбей твоих
не терпящих и в ропоте на Бога и ближняго дни
наша иждивающих, вся свыше посылаемая в
терпении сносить, да взирающе на подвиги
твоя, чистым сердцем зовем ти сице:

Ра́дуйся, миру злохладному благодатную
мудрость явившая;

радуйся, нищеты духовныя блаженство
вкусившая.

Радуйся, образ терпения и благосердия нам
подающая;

радуйся, смирением и покаянием от бед
избавитися научающая.

Радуйся, с молитвою и любовью детей
благословлявшая;

радуйся, ласкою рук твоих чудесно их
исцелявшая.

Радуйся, тоску тяжкую, душу сокрушающую, от
нас отводящая;

радуйся, надеждою несумненною на милость
Божью окрыляющая.

Ра́дуйся, Ксе́ние блаже́нная, моли́твеннице о
душа́х на́ших.

Кондак 8

Стра́нницею бездомною протекла еси путь
скорбный жизни твоея в стольнем граде
отечества нашего, мати всеблаженная,
взыскующи Града Вышняго, Иерусалима
Небеснаго; ныне же в нем со ангелы и всеми
святыми поеси Богу: Аллилу́ия.

Икос 8

Вся в молитвах ко Творцу пребываючи, мати святая, до успения твоего от страданий и подвигов к жизни блаженней и вечней невозбранно прешла еси. Сего ради, преклоняюще колена сердец наших, благоговейное пение ти приносим:

Радуйся, во обителях горних с лики святых ликующая;

радуйся, и нас, тебе молящихся, тамо не забывающая.

Радуйся, чудеса неизчетная по успении твоём явившая;

радуйся, смертно болящих, врачами оставленных, исцелявшая.

Радуйся, во пьянстве гибнущих устрашение и исправление;

радуйся, места служения лишившимся благое поспешение.

Радуйся, вдовиц и жен, супругом оставленных, покровительнице;

радуйся, странников и безприютных питательнице.

Ра́дуйся, Ксе́ние блаже́нная, моли́твеннице о
душа́х на́ших.

Кондак 9

Вся́кия утоли́ болезни, блаженна́я мати Ксение,
на тя наде́ющихся и к помощи́ твоей усердно
притека́ющих, помина́ющих душу́ твою́ для
души́ своея́ спасения́, якоже за́вещала еси́, Богу
же, в тебе́ прославленному́, вопи́ющих
непрестанно́: Аллилу́ия.

Икос 9

Ветя́ суемудренны́я разуме́ти не могут, како́ ты
безумием своимъ безумие́ мира сего́ обличила еси́
и немощи́ своею́ сильны́я и крепкия́ посрами́ла
еси́, не ве́дят бо в тебе́ силы́ Божия́ и
премудрости. Мы же, тя почита́юще, с любви́ю
зовемъ ти си́це:

Ра́дуйся, Божественна́го Ду́ха селение;
ра́дуйся, велие́ к Богу дерзнове́ние.

Ра́дуйся, на усыпальни́це твоей моля́щимся
явля́ющаяся и им помога́ющая;

ра́дуйся, земле́ю и еле́ем от нея́ мно́гия
освятивша́я и от неду́г исцели́вшая.

Радуйся, яко одержимых страстьми́ от гибели спасаеши;

радуйся, яко отвергаться себе нас научаеши.

Радуйся, любви́ и смирения путь во спасение нам открывающая;

радуйся, души́ наша к жизни будущаго века готовящая.

Ра́дуйся, Ксе́ние блаже́нная, моли́твеннице о душа́х на́ших.

Кондак 10

Спасти́ люди хотящи, блаженная мати Ксение, присно да́руеши им заступление твое чудное. Се деву благочестивую, со вдовицею материю ея в канун венчания у могилы твоея усердно молившуюся, от брака со злодеем спасла еси, иже ратнаго человека уби, имя же и чйн его себе присвои: в день той же убийца оный внезапно обличен бысть и, ужасом объят, исповеда всенародно, яко сила Божия сироту от брака с ним избави. Мы же, дивящися силе молитв твоих спасающих, воспеваем Богу: Аллилу́ия.

Икос 10

Стена́ еси́ нерушима́я, преблагенная мати,
домово́м православных. Не остави и ныне
супруги разделенныя, помози родителем, за
грехи своя о чадах слезы проливающим, научи
юноши и девы в чистоте себе хранить и всех нас
святыню уз семейных почитати, да едиными
усты воспеваем ти сице:

Ра́дуйся, дев благочестивых от брака невернаго
избавляющая;

радуйся, спутника жизни добраго им обрести
помогающая.

Радуйся, сродников враждующих благое
примирение;

радуйся, слез детских осушение.

Радуйся, от убиения младенцев во чреве жена́м
грозное прещение;

радуйся, на камени любви и веры домов
устроение.

Радуйся, супругов, смертью разлученных,
ограждение;

радуйся, в жизни бессмертней вечное их
соединение.

Ра́дуйся, Ксе́ние блаже́нная, моли́твеннице о душа́х на́ших.

Кондак 11

Пение благодарственное приносят ти, мати блаженная, людие православнии, от бед и болезней молитвами твоими изба́влении. И ныне, аще попустит нам праведный Господь скорби грех наших ради, со слезами к тебе припадем, уповающе на милостивое твое о нас к Богу предстательство, да воспоем Ему: Аллилу́ия.

Икос 11

Светоза́рная луча́, во мра́це жизни сея́ путь ко Свету Неприступному освещающая, явися житие твое, богомудрая Ксение, и прославление всенародное, чудес множеством осиянное. И в годину лютую гонений безбожных вернии от часовни твоея не отступиша, но, презревше и страх смертный, с верою и упованием к тебе притекаху, сердцем воспевающе сице:

Ра́дуйся, безнадежных наде́яние;

ра́дуйся, в бездне отчаяния погибающих спасение.

Ра́дуйся, униженных и гонимых покровительнице;

раду́йся, от клеветы и суда неправеднаго
защитнице.

Радуйся, обидимых и обездоленных утешение;
раду́йся, обидящих грозное вразумление.

Радуйся, града святаго Петра Небесная
заступнице;

раду́йся, чадом земли Российския матери и
кормилице.

Ра́дуйся, Ксе́ние блаже́нная, моли́твеннице о
душа́х на́ших.

Кондак 12

Благода́ть утешений обильно изливаеши,
блаженная Ксение, всем чтущим память твою и
к заступлению твоему притекающим. Темже и
мы, грешнии, по Бозе на тя надежду возлагаем и
молимся тебе усердно: не остави нас во
обстояниих скорбных, умоли Господа Сил, да не
отпадем от веры нашея православныя, в нейже
тобою утверждаеми, зовем Ему верно: Аллилу́ия.

Икос 12

Пою́ще многая твоя чудеса, блаженная матери
Ксение, восхваляем тя, яко теплую нашу
заступницу и скорую предстательницу.

Улучающе же от тебе помощь благодатную,
неустанно воспеваем сице:

Ра́дуйся, светом кротости твоея вся концы земли
озарившая;

радуйся, житием твоим постническим гордыню
дьявольскую посрамившая.

Радуйся, мира Божия в сердца́ верных
принесение;

радуйся, дому царскому поможение и
благословение.

Радуйся, о спасении отечества нашего присно
молящая;

радуйся, во Отечество Небесное нам путь
указующая.

Радуйся, по Богородице в скорбех и печалех
наше утешение;

радуйся, по Бозе грехов наших прощение и
вечное спасение.

Ра́дуйся, Ксе́ние блаже́нная, моли́твеннице о
душа́х на́ших.

Кондак 13

О свѣта́я блаже́нная ма́ти Ксе́ние, в жити́и твоѣ́м крестъ тяж́кий понѣ́сшая, приими́ от нас гре́шных моле́ние сие́, тебѣ́ приноси́мое, огради́ нас моли́твами твои́ми от наве́тов духо́в тьмы́, от бед и напа́стей, умоли́ Всеще́драго Бо́га пода́ти нам си́лу и кре́пость, да взѣ́мше крестъ свой, во следъ Христу́ гряде́м, пою́ще Ему́ с тобо́ю во ве́ки: Аллилу́ия.

Сей конда́к глаго́лется три́жды.

И па́ки чте́тся 1–й и́кос и 1–й конда́к

Молитва

О свѣта́я блаже́нная ма́ти Ксе́ние! Под кровомъ Всевы́шняго жившая, ве́домая и укрепля́емая Богоматери́ю, гладъ и жажду́, хладъ и зной, поно́шения и гонѣ́ния претерпе́вшая, даръ прозорливости́ и чудотворе́ния от Бога́ получившая и под сени́ю Всемо́гущаго упокои́вшаяся, днесъ же, от славна́го тысяще́летия Креще́ния Руси, Церковь Русская́ прославля́ет тя, яко́ благоуханны́й цветъ.

Предсто́яще на месте́ твоего́ погребѣ́ния, под обра́зомъ твоимъ свѣ́тымъ, яко́ живе́й ти суще́й с нами́, молимся́ ти: приими́ проше́ния наша́ и принеси́ я ко престо́лу Милосер́днаго Отца́

Небеснаго, яко дерзновение к Нему имущая, испроси притекающим к тебе вечное спасение, на благая дела и начинания наша щедрое благословение, от всяких бед и скорбей избавление. Предстани святыми твоими молитвами пред Всемилостивым Спасителем нашим о нас, недостойных и грешных. Помози, святая блаженная мати Ксение, младенцы светом святого крещения озарити и печатью дара Духа Святого запечатлети, юныя в вере, честности, богобоязненности и целомудрии воспитати и успехи в учении им стяжати. Болящия и недугующия исцели, супругом любовь и согласие ниспосли, монашествующим подвигом добрым подвизатися помози и от поношения ограда, пастыри в крепости духа утверди, Церковь и страну нашу сохрани и всех боголюбивых чад в предсмертный час причащения Святых Христовых Таин сподоби, ты бо еси наше скорое услышание и избавление, тебе благодарение возсылаем и с тобою славим Отца и Сына и Святаго Духа ныне и присно и во веки веков. Аминь.

